



後山先生集序



後山先生集凡三十卷余昔錄
之於仁和陳氏者也先生天資
方毅識見過人加以好學不倦
故其形之於言典重峻潔法度
森然如天球綴輅陳列廣庭大
劍高冠班侍左右其孰敢狎而

玩之雖大儒先生如晦菴者亦
咨重不置至取其與林秀州書
列之儀禮經傳通解之中以補
禮文之闕是可見矣然先生並
世有二程夫子者倡明道學於
河洛之間樞衣之士幾徧天下
斯誠千載之一時也而先生方

且學文於曾南豐學詩於黃山
谷周旋於蘇東坡秦淮海之間
而不知遊二程之門以學其道
是以雖有所成而人猶有所憾
以為持是資而能知所從聖賢
可學而至則其所可傳者豈止
於是哉此為深可惜耳潞守馬

君暉者字廷震先生同郡之名
家也景仰高風購求遺藁近二
十年矣比聞予有是集欣然請
錄既付於梓而併靳序之憶昔
弘治癸丑春余以南京戶部主
事考績如京師時冢宰盧氏耿
公方為大宗伯余往候馬公引

而進之從容誨獎且問頃在江
南有新收書否予對以所得稽
古錄范唐鑑後山集公驚曰是
數輩書吾求之不得以為亡且
久矣乃今尚有之歸日幸錄以
相惠余應曰諾後竟以職務匆
冗因循未報而公逝矣今馬君

託梓以傳寔不朽之盛事恨不
令公見之是書無別本校證訛
字頗多觀者以意讀之可也其
每卷之首載賤姓名而題曰重
校者蓋太史公所謂附驥之意
非事實也先生姓陳氏名師道
字履常一字無已號後山彭城

人其言行之詳官閣之次宋史
有傳門人魏衍有記茲不復列
云

弘治十二年己未夏四月二十
七日奉議大夫山西等處提刑
按察司僉事南陽王鴻儒序

彭城陳先生集記

門人彭城魏衍撰



先生姓陳諱師道字履常一字
無已彭城人幼好學行其所知
舉古作者不為進取計也年十
六謁南豐先生曾公鞏曾大器
之遠受業于門元豐四年神宗

皇帝命曾典史事且謂脩史最難中較切至曾薦為其屬朝廷以白衣難之方復請而以憂去遂寢太學又薦其文行乞為學錄不就樞密章公惇高其義冀來見特薦于朝而終不一往元祐初翰林學士蘇公軾與侍從

列薦乃官之俾教授其鄉未幾除太學博士言事者謂先生嘗謁告詣南都見蘇公為私遂罷移潁州教授紹聖初又以餘黨罷換江州彭澤令未行丁母憂寓僧舍人不堪其貧暨外除猶不言仕者凡四年左右圖書日

以討論為務蓋其志專欲以文學名後世也元符三年除棣州教授隨除祕書省正字將用矣歿於建中靖國元年十二月之二十九日年四十九友人鄒公浩買棺以殮朝廷特賜絹二百匹嘗與往來者共贖之然後得

歸初先生學於曾公譽望甚偉及見豫章黃公庭堅詩愛不捨手卒後其學黃亦不讓士或謂先生過之惟自謂不及也先生既歿其子豐登以全藁授衍曰先實知子子為編次而狀其行衍既狀其行矣親錄藏於家者

今十三年顧未敢當也衍嘗謂
唐韓愈文冠當代其傳門人李
漢所編衍從先生學者七年所
得為多今又受其所遺甲乙丙
藁皆先生親筆合而校之得古
律詩四百六十五篇文一百四
十篇詩曰五七雜以古律文曰

千百不分類衍今離詩為六卷
類文為十四卷次皆從舊合二
十卷目錄一卷又手書之竊惟
先生之文簡重典雅法度謹嚴
詩語精妙蓋未嘗無謂而作其
志意行事班班見於其中小不
逮意則棄去故家之所留者止

此昔漢楊雄作太玄法言箴賦如劉歆號知文始敬之後而短毀謂其必傳者桓譚一人而已先生之文蚤見稱於曾蘇二公世人好之者猶以二公故也今賢士大夫競收藏之則其傳也奚待於衍耶後豈不有得手寫

故本以證其誤者則不肖之名因附茲以不朽為幸焉其闕方求而補諸又有解洪範相表闡微彰善詩話叢談各自為集云政和五年十月六日謹記

建中靖國辛巳之冬雲別涪翁於荊州翁曰陳無已天下

士也其讀書如禹之治水知天下之脉絡有開有塞至于九川滌源四海會同者也其論事救首救尾如常山之蛇其作文深知古人之關鍵其作詩深得老杜之句法今之詩人不能當也子有意學問

不可不往掃斯人之門雲再拜受教明年春至京賢士大夫出涕相吊曰無已亡矣雲驚歎失聲痛恨無窮泊來彭城求先生詩文且四年僅見一二最後得昌世所集凡六百五篇琮璜珩瑤貫列大備

雲曰幸矣至寶不歿乃今有
獲因記涪翁之語錄以示昌
世自昔名世之士著書立言
必賴其徒傳之文中子講道
河汾以續六經房魏之倫皆
北面受業及登廊廟不能顯
傳其書卒以泯絕論者至今

惜之昌世先生之高第操行
文章雅善先生之風雖隱約
布韋而所立絕人不苟徇合
故能蒐拾遺文成一家之言
又序先生出處之大節其辭
蔚然讀之使人凜凜增慕然
先生之道必傳於後世者昌

世之力也千載之下可以知其賢矣政和丙申正月甲午元城王雲題

讀後山詩大似參曹洞禪不犯正位切忌死語非冥搜旁引莫窺其用意深處此詩註所以作也近時刊本參錯繆

誤政和中王雲子飛得後山門人魏衍親授本編次有序歲月可考今悉據依略加緒正詩止六卷益以注卷各釐為上下作之有謂而存之可傳無恠夫詩之少也衍字昌世作後山集記頗能道其出

後山先生集
處今置之篇首後有學者得
以覽觀焉天社任淵書

後山先生集目錄



卷第一

詩七十八首

卷第二

詩二十六首

卷第三

詩一百一十首

卷第四

詩七十二首

卷第五

詩八十一首

卷第六

詩九十三首

卷第七

詩四十一首

卷第八

詩三十八首

卷第九

詩四十首

卷第十

詩三十九首

卷第十一

卷第十二

詩四十四首

卷第十三

詩一十七首

序九篇

卷第十四

書三十七通

卷第十五

記一十五篇

卷第十六

論四道

卷第十七

策二道

策問一十八首

卷第十八

表一十三通

啓一十三通

祭文七道

卷第十九

雜著三十六首

卷第二十

墓銘十道

墓表二道

行狀二道

神道碑一道

卷第二十一

談叢一十七條

卷第二十二

談叢四十五條

卷第二十三

談叢四十八條

卷第二十四

談叢三十五條

卷第二十五

談叢四十五條

卷第二十六

談叢四十四條

卷第二十七

理究三十七條

卷第二十八

詩話三十七條

卷第二十九

詩話四十二條

卷第三十

長短句四十九首

卷第二十五

後山先生集目錄終

後山先生集卷第一

彭城陳師道履常著

茶陵陳仁子同甫編校

後學南陽王鴻儒懋學重校

後學彭城馬暉廷震繡梓

詩

妾薄命二首後山自注曰
曾南豐作

主家十二樓一身當三千古來妾薄命事主不盡年

起舞為主壽相送南陽阡忍著主衣裳為人作春妍

有聲當徹天有淚當徹泉死者恐無知妾身長自憐

又



葉落風不起山空花自紅捐世不待老惠妾無其終
一死尚可忍百歲何當窮天地豈不寬妾身自不容
死者如有知殺身以相從向來歌舞地夜雨鳴寒螿

送外舅郭大夫槩西川提刑

丈夫東南來復作西南去連年萬里別更覺貧賤苦
王事有期程親年當喜懼畏與妻子別已復迫曛暮
何者最可憐兒生未知父盜賊非人情蠻夷正狼顧
功名何用多莫作分外慮萬里早歸來九折慎馳騫
嫁女不離家生男已當戶曲逆老不俟知人公豈誤

送內

鹿麋顧其子燕雀各自隨與子為夫婦五年三別離

兒女豈不懷母老妹已笄父子各從母可喜亦可悲
關河萬里道子去何當歸三歲不可道白首以為期
百畝未為多數口可無飢吞聲不敢盡欲怨當歸誰

別三子

夫婦死同穴父子貧賤離天下寧有此昔聞今見之
母前三子後孰視不得追嗟乎胡不仁使我至於斯
有女初束髮已知生離悲枕我不肯起畏我從此辭
大兒學語言拜揖未勝衣喚爺我欲去此語那可思
小兒襁褓間抱負有母慈汝哭猶在耳我懷人得知

寄外舅郭大夫

已通歸使妻孥且舊居深知報消息不忍問何如

身健何妨遠情親未肯踈功名欺老病淚盡數行書

城南寓居二首

游子莫何歸韋杜城南村秋水深可測挽衣踏行雲
道暗失歸處棲鳥故不喧牛羊閉籬落稚子猶在門

又

潭潭光明殿稽首西方僊平生脩何行步有黃金蓮
我豈昔好徑報以履下穿洗足坐道場卒卒此何緣

憶少子

端也早豐下歲晚未可量我老不自食安得如我長
呱呱棄不予退省未始忘吾母亦念我與爾寧相望

絕句

翼翼陳州門萬里遷人道昔人死別處一笑欲絕倒

寄外舅郭大夫

丈人曾諸生明刑如臯陶幸寬右顧憂未惜一身遙
西南萬里行可以斷繩橋慎勿冠惠文神母仁如堯

贈二蘇公

岷峨之山中巴江桂椒榭檣楓柞樟青金黃玉丹砂
良獸皮鳥羽不足當異人間出駭四方嚴王陳李司
馬揚一翁二季對相望竒寶橫道驥服箱誰其識者
有歐陽大科異等固其常小却盛之白玉堂典謨雅
頌用所長度越周漢登虞唐千載之下有素王平陳
鄭毛視荒荒後生不作諸老亡文體變化未可量萬

口一律如吃羗妖狐幻人大陸梁虎豹却走逢牛羊
上帝惠顧祓不祥天門夜下龍虎章前驅吳回後炎
皇絳旂丹轂朱冠裳從以甲冑萬鬼行乘風縱燎無
留藏天高地下日月光授公以柄扶病傷士如稻苗
待公秧臨流不度公為航如大醫王治膏肓外證已
解中尚強探囊一試黃昏湯一洗十年新學賜老生
塞口不敢嘗向來狂殺今尚狂請公別試囊中方

南豐先生挽詞二首

早棄人間事真從地下游立原無起日江漢有東流
身世從違裏功言取次休不應須禮樂始作後程仇
又

精爽回長夜衣冠出廣庭勲庸留琬琰形像付丹青
道喪餘篇翰人亡更典刑侯芭才一足白首太玄經

暑雨

密雨吹不斷貧居常閉門東溟容有限西極更能存
東濕炊懸金翻床補壞垣倒身無着處呵手不成溫

送江楚州

濠梁初得意關里舊論詩晚歲何多難經年始一辭
淮人飢饉後良吏拊循時欲託山陽簿翁歸不受私

送江端禮

正學元非世能詩新有聲諸公交鄭泰多士閉何生
况愛經過數移書底裏傾又為淮海別病眼向誰明

晁無咎張文潛見過

白社雙林去高軒二妙來排門衝鳥雀揮壁帶塵埃
不憚除堂費深愁載酒回功名付公等歸路在蓬萊

次韻荅邢居實二首

漢庭用少公何在不使群飛接羽翰今代貴人源白
髮掛冠高處未宜彈

又

秋來為客意何如千里河山信不疎昔日老人今則
少不妨紅葉閉門書

丞相溫公挽詞三首

恭默思良弼詩書正百工事多違謝傳天遽奪揚公

一代風流盡三師禮數崇若無天下議美惡併成空

又

百姓歸周老三年待魯儒時方隨日化身已要人扶
玉几雖來晚明堂訖授圖心知死諸葛終不羨曹蜍

又

少學真成已中年託著書輟耕扶日月起廢極吹噓
得志寧論晚成功不願餘一為天下慟不敢愛吾廬

次韻荅學者四首

津津爽氣貫眉目十五男兒萬里身筆下倒傾三峽
水宵中別作一家春

又

黃塵投老得何郎，准擬明年共我長。熏沐不為杯酒
污，飛揚未許老夫量。

又

暗中摸索不難知，眼裏輪囷却見稀。行地徑須先八
駿，刺天終不羨群飛。

又

太阿無前鋒，不缺鉞刀不堪供。一切至柔統指剛，則
折善而藏之光奪月。

次韻秦觀聽鷄聞鴈二首

行斷哀多影不留，有人中夜攬衣裘。筆頭細字真堪
恨，眼裏長檠不解愁。

又

立馬堦除待一鳴，何如春夢不聞聲。固知鷄口羞牛
後，不待鳴群已可驚。

朝秦觀

長鋏歸來夜帳空，衡陽回鴈耳偏聰。若為借與春風
看，無限珠璣咳唾中。

和豫章公黃梅二首

寒裏一枝春，白間千點黃。道人不好色，行處若為香。
又

色輕花更艷，體弱香自永。玉質金作裳，山明風弄影。

答張文潛

我貧無一錐所向皆四壁瀛洲足風露胡不減飢色
昔聞杜氏子剪髮事尊客君婦定應賢三梳奉巾櫛
疾風回雨水明霞沙步叢祠欲莫鷓九日清樽欺白
髮十年為客負黃花登高懷遠心如在向老逢辰意
有加淮海少年天下士可能無地落烏紗

九日寄秦觀

巨野

餘力唐虞後沉人海岱西不應容桀黠寧復有青齊
燈火魚成市帆檣藕帶泥十年塵霧底瞥眼怪鳥驚
示三子
去遠即相忘歸近不可忍兒女已在眼眉目略不省

極喜不得語淚盡方一哂了知不是夢忽忽心未穩

烏呼行

去年米賤家賜粟百萬官倉不餘掬青錢隨賜費追
呼昔日剜瘡今補肉今年夏旱秋水生江淮轉粟千
里行不應遠水救近渴空倉四壁雀不鳴似聞為政
不為費兩不相侵兩相濟十年斂積用一朝驚濤破
山風動地

秋懷示黃預

窓鳴風歷耳道壞草侵衣月到千家靜林昏一鳥歸
冥冥塵外趣稍稍眼中稀送老須公等秋棊未解圍
送張支使

曠度逢知晚高才處下難清秋一鷄上拭目萬人看
白酒初同醉黃花已戒寒憑將衰老事一一報長安

送杜侍御純陝西轉運

餽糧千里古無策木牛流馬功不極邊頭數米換黃
金將軍汗馬未伏櫪黠羗人面作胡語鳥鼠貪生爾
如許熊虎可避蟲可驅覆巢熏穴意何如漢虜相當
庸可盡聊城正用一封書巧手莫為無麵餅誰能留
渴須遠井國家有急君得辭徐人不勞扣關請隴上
壯士莫捫舌河西狂王防係頸向來此地幾送迎草
間翁仲口不瘖十年兩熟飽可待一歲四守人何心
老稚持車車不留歸人不行行轉頭關中正須蕭丞

相省內早要富民侯

送楊侍禁兼寄顏黃二公二首

相逢今已晚同府尚經年衆口不成虎諸公更薦賢
兩親須薄祿一障欲乘邊徃問顏夫子何妨試着鞭

又

多問黃居士終年欠一書因人候消息有使報何如
向晚逢揚子真堪託後車親年方賴祿不惜借吹噓
送外舅郭大夫夔路提刑

天險連三峽官曹據上游百年雙鬢白萬里一身浮
可使人無訟寧須意外憂平生晏平仲能費幾狐裘
雪後黃樓寄負山居士

林廬煙不起城郭歲將窮雲日明松雪溪山進晚風
人行圖畫裏鳥度醉吟中不盡山陰興天留憶戴公
謝人寄酒
舊香餘味記黃封厭見春泥滿眼紅千乘莫從公子
後百壺能為故人東

從蘇公登後樓

倏作三年別才堪一解顏樓孤帶清洛林缺見巴山
五月池無水千年鷗自還白鷗沒浩蕩愛惜鬢毛斑

送蘇公知杭州

平生羊荊州追送不作遠豈不畏簡書放麈誠不忍
一代不數人百年能幾見昔如馬口銜今為禁門鍵

一雨五月涼中宵大江滿風帆目力短江空歲年晚

送秦觀二首

士有從師樂諸兒却未知欲行天下獨信有俗間疑
秋入川原秀風連鼓角悲目前狔犬類未必慰親思

又

師法時難得親年富有餘端為李君御盡讀鄴侯書
結友真莫逆論才有不如折腰終不補可但曳長裾

和江秀才獻花三首

風雨東籬冷落看清溪水落玉峯寒酒家不辨當壚
費乞與先生種杏壇

又

疎花得雨數枝黃白髮綠愁百尺長要與老生同一
醉故留秋意作重陽

又

江公孤憤不宜秋吟作秋虫到白頭過我可為千日
醉從公難作百錢游

次韻李鄴推九日登南山

平林廣野騎臺荒山寺鳴鍾報夕陽人事自生今日
意寒花只作去年香巾欵更覺霜侵鬢語妙何妨石
作腸落木無邊江不盡此身此日更須忙

別負山居士

田園相與老此別意如何更病可無酒猶寒已自和

高名胡未廣詩興尚能多沙草東山路猶須一再過

送趙教授

束髮相看到白頭了知公鬢不勝憂可堪親老須三
釜又着儒冠忍一羞平世功名須晚節向來旬月取
封侯北州豪傑知誰健乞我黃淤十里秋

次韻春懷

欲作歸田計無如二頃何折腰方賴祿拭面未傷和
日下烏聲樂塵生鳥跡多渡頭留小楫乘興得相遇

黃梅五首

異色深宜晚生香故觸人不施千點白別作一家春
又

舊鬢千絲白新梅百葉黃留花如有待迷國更須香

又

冉冉稍頭綠婷婷花下人欲傳千里信暗折一枝春

又

黃裏含真意春容帶薄寒欲知誰稱面徧插一枝看

又

花裏重重葉釵頭點點黃祇應報春信故作着人香

田家

鷄鳴人當行犬鳴人當歸秋來公事急出處不待時
昨夜三尺雨竈下已生泥人言田家樂爾苦人得知

巨野二首

紅落芙蓉晚青深蒲稗秋平湖無過鳥鳴鼓有行舟

又

蒲港侵衣綠蓮塘亂眼紅將身供世事結纜待回風

別叔父錄曹

為吏專文法成家託弟昆三年如昨日一笑更何言
扶老須微祿移官實至恩兩踈元父子何日復東轅

出清口

家世山東飽耕稼晚託一舟順流下漁溝寒餅不下
筋推拖轉頭更五夜平明放溜出清口霜落潮回霧
連野平淮一夢三十里有日無風神所借似憐憂患
滿人間百孔千瘡容一罅文章末技將自効語不驚

人神可嚇子女玉帛君所餘寄聲白鳥煩多謝

泛淮

冬暖仍初日潮回更下風鳥飛雲水裏人語櫓聲中
平野容回顧無山會有終倚檣聊自逸吟嘯不須工

猴馬有序

楚州紫極宮有畫沐猴振索以戲馬頗索以
驚園人不測從後鞭之人言沐猴宜馬而今

為累作詩以導馬意韓鄂四時纂要曰常繫
猴於馬坊內辟惡消

百病令馬
不着疥

沐猴自戲馬自驚園人未解猴馬情猴其天資馬何
罪意欲防患猶傷生異類相宜亦相失同類相傷非

所及志行萬里因一誤吐豆齧芡甘伏極

徐氏閑軒

倦游梁楚愛吾廬老寄山林孰與娛想見杖藜臨過
鳥更能赤手縛於菟君寧平世輕三金我亦東原有
一區擬買婢娟作歸計可無堆玉斗量珠

寄豫章公三首

密雲不雨卧烏龍已足人間第一功得諾向來輕季
子打門何日走周公

又

愧無一縷破雙團憤下薑鹽枉肺肝誓酒不應忘此
老論詩寧肯乞簷官

又

人須百斛買雙鬟水截龍章試虎斑老覺才疎渾不
稱自携雲月瀉潺湲

贈秦覲

兩秦並立難為下萬里長驅在此初別後未忘三日
語人來肯作數行書

又

文章從古不同時詩語驚人筆益奇過與阿平應絕
倒世間能有幾人知

次韻秦少游春江秋野圖

翰墨功名裏江山富貴人
倏看雙鳥下已負百年身

又

江清風偃木霜落鴈橫空
若箇丹青裏猶須着此翁

幼嶺

外家英俊場季氏不好弄
用意立壑間頗以石自奉
誰言拳握間意作萬牛重
岱宗小天下不辦一席用

絕句

斫水水可斷續弦弦可完
如何鄭公客不作百年看

贈歐陽叔弼

早知汝穎多能事晚以詩書託下僚
大府禮容寬懶慢故家文物尚嫖姚
只將憂患供談笑敢望功言荅聖朝
歲歷四三仍此地家餘五一見今朝

後山先生集卷第一

後山先生集卷第二

彭城陳師道履常著

茶陵陳仁子同甫編校

後學南陽王鴻儒懋學重校

後學彭城馬暉廷震繡梓

詩

觀文忠公家六一堂圖書

生世何用早我已後此翁頗識門下士略已聞其風
中年見二子已復歲一終呼我過其廬所得非所蒙
先朝群玉殿冠佩環群公神文煥王度喜色見天容
御榻誰復登帝書元自工黃絹兩大字一覽涕無從

似欲託其子天意人與同歷數况有歸敢有貪天功
集古一千卷明明並群雄誰為第一手未有百世公
廟器刻科斗寶樽蟠華蟲緬懷弁服士酬獻鳴琤瑤
挿架一萬軸遺子以固窮素琴父絕弦碁酒頗闕供
向來一瓣香敬為曾南豐世雖嫡孫行名在惡子中
斯人日已遠千歲幸一逢吾老不可待露草濕寒螿
送蘇迨

宵中歷歷着千年筆下源源赴百川真字飄揚今有
種清談絕倒古無傳出塵解悟多為路隨世功名小
着鞭白首相逢恐無日幾時書札到林泉

送黃生兼寄二謝

南第諸兄蚤相見別時託子以無倦百年論交見子
心一朝取別寧吾願妙歲遠遊真所難肯為得官近
長安聖作詩書端有意猶須用心科舉外

又

城西兩謝俱能文穰丞精悍吾所聞每讀吾詩得人
意使不能文已可人我昔謝公門下士早年妄作功
名意如今老寄潁河東九泉雖深愧此公

次韻蘇公西湖徙魚三首

窮秋積雨不破塊霜落西湖露沙背大魚泥蟠小魚
樂高丘覆杯水如帶魚窮不作搖尾憐公寧忍口不
忍鱠脩鱗失水玉參差晚日搖光金破碎咫尺波濤

有生死安知平陸無灘瀨此身寧供刀几用着意更
須風雨外是間相忘不為小濠上之意誰得會枯魚
雖泣悔可及莫待西江與東海

又

赤手取魚如拾塊布網鳴舷攻腹背豈知激濁與清
流恐懼駢頭牽翠帶居士仁心到魚鳥會有微生化
餘鱸寧容網目漏吞舟誰能烹鮮作苛碎我亦江湖
釣竿手悞逐輕車從下瀨生當得意落鷗邊何用封
侯墮鳶外不如此魚今得所置身暗與神明會徑須
作記戒鯨鯢防有任公釣東海

又

詩成落筆驥歷塊不用安西題紙背小家厚劔四壁
立拆東補西裳作帶堂下敲鯨牛何罪太山之陽人
作鱸同生異趣有如此鉗懸甍間終一碎流水長者
今公是兩花散亂投金瀨人言充庖湏此輩慈觀更
湏容度外賜墻及有人得視公才槃槃一都會有憐
其窮與不朽我亦牽聯書玉海

次韻蘇公西湖觀月聽琴并涉頴二首

清湖納明月遠覽無留雲人生亦何湏有酒與桐君
自醉寧問客一盃復一盃平生今不飲意得同酣醺
清言冰玉質壞衲山水紋殫精有後悟高耳無前聞
潛魚避流光歸鳥投重昏信有千丈清不如一尺渾

衝風不成寒脫木還自竒坐看白日晚起行清潁湄
三穴未為得一舟不作癡路暗鳥遺音江清魚弄姿
宇定恠物變意行覺舟遲公與兩公子妙語含風漪
但怪笑談劇莫知賓主誰得句未肯吐鬱鬱見睫眉
相從能幾何行樂當及茲生忍自作難百憂間一嬉
時尋赤眼老不探黃口兒解公頭上巾一洗七年緇
至潔而納汚此水真吾師頃公曉二子人自窮非詩

再次韻蘇公示兩歐陽

公詩周魯後曳曳垂天雲府中顧長康風味如麴君
非公無此客請壽南山樽叔季大儒後偏醒亦同醺
心與栢石堅章成綺繡紋多難獨不補少贛今無聞

時無古今異智有功名昏可使百尺底不作數斗渾

次韻蘇公勸酒與詩

五士三不同煩公以詩訴強酒古所辭妙語神其吐
自念每累人舉扇無我汚復使兩歐陽縮手不分付
平生西方社努力漬自度不憂龜九頭肯為語一誤
頓悟而漸脩從此辭世故公看萬金產寧能一朝具
兩生文章家夙紀鳴蟬賦請公堅城壘兵夾後無數

次韻蘇公督兩歐陽詩

吟聲正可供蟲鳴酒面猶須作老兵豈有文章妨要
務孰知詩律自前生向來懷璧真成罪未必含光不
屢驚血指汗顏終縮手此懷端復向誰傾

次韻蘇公題歐陽叔弼息齋

行者悲故里居者愛吾廬生須着錐地何賴汗牛書
丈室八尺床稱子閉門居百為會有還一足不願餘
紛紛幼老間失得了玄虛客在醉則眠聽我莫問渠
論勝已絕倒句妙方愁予竹几無留塵霜畦有餘蔬
相從十五年不為食有魚時湏一俛仰君可貸蘧蔭

次韻蘇公竹間亭絕句

竹裏高亭燈燭光今年復得杜襄陽
修看老蓋千年後更想霜林百尺強

寄參寥

平生西方願擺落區中緣惟於世外人相從可忘年

道人贊公徒相識幾生前早作步兵語晚參雲門禪
拾策孤山下一室頗蕭然林昏出幽磬竹杪橫疎煙
昨日寄書至坐想參寥泉此泉如此公遇物作清妍
一別今幾時綠首成白顛子亦憐我老我豈要子憐
會逢萬里風一繫五湖舡酌我巖下水咽子山中篇

北渚

南蕩不可度北渚風浪生向來狐兔迹已復蛟鼉鳴

東禪

東阡急雨不成泥度密穿青取迳微邂逅無人成獨
往慙慙有月與同歸

八月十日二首

一夢人間四十年只應炊竈固依然兩官不辦一丘
費五字虛隨萬里舡

又

人生七十今強半老去光陰已後身更欲置身須世
外世間元自不關人

迎新將至漕城

早投林野遠風雨晚傍塵沙飽送迎却愧兩街屠販
子卧聽車馬過橋聲

即事

老覺山林可避人正須麋鹿與同群却嫌鳥語猶多
事強管陰晴報客聞

齋居

青奴白牯靜相宜老罷形骸不自持一枕兩窓深閉
閤卧聽叢竹雨來時

中秋夜東利贈仁公

盈盈秋月不餘分葉露懸光可數塵此地正須煩一
笑要令排戶問東隣

十五夜月

向老逢清節歸懷託素暉飛螢元失照重露已霑衣
稍稍孤光動沉沉萬籟微不應明白髮似欲勸人歸

胡士彥挽詞二首

晚進違前輩平生闕異聞吾猶識此老天豈喪斯文

善學家傳業英詞世不群固應識尚白官序見揚雲

又

此地來何晚經年見未頗薦賢仍賭命有道可辭貧
徒弟三千子聲名四十春襄陽耆舊內無復姓龐人

後山先生集卷第二

後山先生集卷第三

彭城陳 師道 履常著

茶陵陳 仁子 同甫編校

後學南陽王鴻儒懋學重校

後學彭城 馬暉廷震繡梓

詩

送趙承議

先生隱德世難名晚見諸孫也自成潁水向來須好
句道山今日有宗英林湖更覺追隨盡巾帽猶堪語
笑傾勤苦讀書終不補未須墻角棄長檠

寄李學士

眼看游舊半東都五歲曾無一紙書平日齊名多早
達莫年同國未情疎稍尋東刹論茲事賴有西方託
後車說與杜郎須着便不應濠上始知魚

雪

初雪已覆地晚風仍積威木鳴端自語鳥起不成飛
寒巷聞驚犬鄰家有夜歸不無慙敗絮未易泣牛衣

晚出

應俗敢辭疾衝風寧小驅聊為一日役不憚百金軀
雪路無行迹水枝有落烏寒門閉蕭瑟窮里聽戲吁

寄晁載之兄弟

人言婚宦情欲本我始求脫君已半孰知一世如一

夢在夢而覺寧待旦寒簷凍雨作秋聲冷屋風燈挑
不明樽前已作十年語後會未期吾屢驚一聞七字
心已識鈎章棘句天與力念子方壯我已衰不見參
天二千尺季也亦有詩百篇叔子擬度驂騑前端能
過我三冬學可復參儂一味禪

寄荅王直方

人情校往復屢勉終不近新詩已經年知子不我怨
生世餘幾何尺筭日取寸懷祿有遐心從俗無遠韻
時從府中歸數過林下飯平生功名意回作香火願
三年不舉觴吻頻烟火炊豈無兩蒼龍露我一雨潤
官麓詩未工猛乞無小靳人生如此耳文字已其閤

是身雖臭腐寧作青紫檀永懷忘年友死矣餘令聞
念子頗似之老我何所恨

寄侍讀蘇尚書

六月西湖早得秋二年歸思與遲留一時賓客餘枚
叟在處兒童說細侯經國向來須老手有懷何必到
壺頭遙知丹地開黃卷解記清波沒白鷗

寄亳州林待制

湖海相望闕寄聲雲林過雨未全晴青衫作吏非前
日白首論文笑後生似聽兒童迎五馬稍脩書札問
專城一聞苦李蒙莊句不復人間世後名

卧疾絕句

老裏何堪病再來愁邊不復酒相開一生也作千年
調兩脚猶須萬里回

南軒絕句

少日書林頗著勲莫年貪佛替論文銅鑪瓦枕芒鞋
裏此外惟須對此君

獨坐

文章平日事風竹暮年須衰疾懸知此霜毛不更除
一丘吾欲往百畝有如無魑魅須游子乾坤着腐儒
扣門聞啄木勸酒有提壺門迳無行迹秋來不遣鋤

寄送定州蘇尚書

初聞簡策侍前梳又見衣冠送作州北府時清惟可

飲西山氣爽更宜秋功名不朽即通袖海道無遺具
一舟枉讀平生三萬卷貂蟬當復自兜鍪

寄荅李方叔

平生經世策寄食不資身孰使文章著能辭轍跡頻
帝城分不入書札訶何人子未知吾懶吾寧覺子貧
智寶院後樓懷胡元茂

晚渡呼舟疾寒城着霧深昏鷗明鳥道風葉亂霜林
父客登樓目中年懷舊心猶須一長笛領覽自霑襟

元日

老境難為節寒稍未得春一官兼利害百慮孰踈親
積雪無歸路扶行有醉人望鄉仍受歲回首望松筠

放懷

施食烏鳶喜持經鳥鼠聽秋蕪矜矍鑠顧影怪伶俜
門靜行隨月窓虛卧見星擁衾眠未穩艱阻飽曾經
絕句

此生精力盡於詩未歲心存力已疲不共盧王爭出
手却思陶謝與同時

送伯兄赴吏部改官

先子初增秩年侵鬢已皤念兄今善繼此別喜如何
親老家仍困門衰仕未多猶須教兒子早要中文科

寄張文潛

今代張平子堆深次子長名高三俊上官立右螭傍

車笠吾何恨飛騰子莫量時平身早達未用夢凝香

後湖晚坐

水靜備一作淨偏明眼城荒可當山青林無限意白鳥有
餘閑身致江湖上名成伯季間目隨歸鴈盡坐待莫
鷗還

春興

東風作惡不成寒野水穿沙自作灘細草無端留客
卧繁枝有意待人看

次韻回山人贈沈東老二首

一杯領意不須沽六字持身已有餘癡子未知天上
樂先生今解世間書

後篇屬沈東老

隨世功名非所望稱家豐儉不求餘青衫出指論音
字白髮挑燈寫細書

送孝忠二首

老眼元多淚春風見此行又為貧賤別更覺急難情
斗食吾堪老詞場爾向榮未須憐野鷺家法付宣城
又

經史三年學聰明一旦開把文甘潦倒數日待歸來

士患聲名早官今歲月催有親須薄祿臨路尚徘徊

以桂一作桂杖一作杖供仁山至二首

錯節孤根勁有餘坐床須按起須扶一生用底今相

贈更問林間有此無

又

洗足投筇只坐禪
厭尋歧路費行纏
老來不復人間事
不用山公更削圓

項城道中寄劉令使修溪橋

老怯危橋泥沒膝
喜聞吾黨政如春
須君不惜千金費
此後寧無我輩人

碓磨寨

以人為食殺為戲
自昔無聞爾所先
信有亡身一言盡
獨能遺臭萬人傳

寄張宣州

與世情將盡
懷仁老未忘
故人今五馬
高處謾三長
詩豈江山助
名成沈鮑行
肯為文俗事
打鴨起鴛鴦

送倫化主

赤髭白足可憐生
躡蹻擔囊壯此行
要致雪峯千五百
不妨兼識謝宣城

西湖

小徑才容足
寒花只自香
官池下鳧鴈
荒塚上牛羊
有子吾甘老
無家去未量
三年哦五字
草未借輝光

別月華嚴

寓世生同里
隨方去有情
來為百年別
不惜片時程
齋鉢須勤供
經鍾莫倦鳴
當來第三會
此界却逢迎

送吳先生謁惠州蘇副使

聞名欣識面異好有同功我亦慙吾子人誰恕此公
百年雙白鬢萬里一秋風為說任安在依然一秃翁

別圓澄禪師

法施老人卧不出呼我取別行問疾磨盤拭筋勸一
飽少待須臾莫倉卒早年着眼觀文字萬卷初無一
言契多生綺語未經懺半世虛名足為累此去他來
尚有緣頭童齒豁恐無年慙慙三請久住世弊惡可
念未可指平生准擬西行計老着人間此何意他年
佛會見頭陀知是當年老居士

別觀音山主

離合應生理過逢豈近緣情親見今日語妙記當年
閉戶安禪主衝風逆水舡不應清夜月故作別時圓

離穎

河市千人聚寒江百尺牽吾生能幾日此地費三年
叢竹防供爨池魚已割鮮拙勤終不補他日愧無傳

湖上

湖上難為別梅梢已着春林喧鳥啄啄風過水鱗鱗
緣有三年盡情無一日親白頭獸奔走何地與為鄰

舟中二首

惡風橫江江卷浪黃流湍猛風用壯疾如萬騎千里
來氣壓三江五湖上岸上空荒火夜明舟中起坐待

殘更少年行路今頭白不盡還家去國情

又

野火燒原雉昏雖黃塵漲天牛亂闖江間無日不風
波老去何時脫奔走詩書滿腹不及口遮日寧須釣
竿手愧爾茅簷多背人仰日青天搔白首

規禪停雲齋

淨居衆天人宮殿隨所適少仕老不歸重門閉榛棘
道人秀叢林妙語出禪寂是身如浮雲隨處同建立
平生與二子嗜好同一律我此復助緣語綺已多責
何年一把茅據坐孤峯律呵佛罵祖師塗糊千五百
荅晁以道

轉走東南復帝城故人相見眼偏明十年作吏仍餬
口兩地為鄰關寄聲冷眼尚堪看細字白頭寧復要
時名孰知范叔寒如此未覺嚴公有故情

病起

今日秋風裏何鄉一病翁力微須杖起心在與誰同
災疾資千悟寃親併一空百年先得老三敗未為窮
九月九日魏衍見過

節裏能相過談間可解憂致踈君未肯得此我何由
語到君房妙詩同客子游一經從白首萬里有封侯

別黃徐州

姓名曾落薦書中刻畫無鹽自不工一日虛聲滿天

下十年從事得途窮白頭未覺功名晚青眼常蒙今
昔同衰疾又為今日別數行老淚灑西風

次韻答晁無斁

女生願有家名妾以不聘田里亦慕君又惡不由正
欲行不問途已破寧顧甌耕蠶無一厘庖井要三徑
還家憂患餘挽鬚兒女競十年寧有此一寒可無命
平生晁夫子得士公室慶稍無車馬音復作賓客請
論文到韓李念舊說蘇鄭長年斷消息獨語誰和應
此生恩未報他日目不瞑歸卧無好懷扣門有佳聽
詩來霜雪後更覺天宇淨少好老未工持刃授子柄

次韻無斁偶作

肩聳三峯峻眉尾八字橫玄談人絕倒家法句新清
八俊先張子諸公少賈生已傳烏鵲喜欲聽鶴鷄聲

其二

此老三年別何時萬里回更無南去鴈猶見北枝梅
會有哀籠鳥寧湏溺死灰聖朝無棄物與子賦歸哉

古墨行并序

晁無斁有李墨半丸云 裕陵故物也往於秦少
游家見李墨不為文理質如金石亦 裕陵所賜
王平甫所藏者潘谷見之再拜云真廷珪所作也
世惟王四學士有之與此為二矣嗟乎世不乏奇
乏識者耳敬為長句率無斁同作

秦郎百好俱第一烏鵲一丸如漆姿如石巧作松身
與鏡面借美於外非良質潘翁拜跪摩老眼一生耳
見三歎息了知至鑒無遁形王家舊物秦家得君今
所有亦其亞伯仲小低猶子姪黃金白壁孰不有古
錦句囊聊可敵睿思殿裏春夜半燈火闌殘歌舞散
自書細字荅邊臣萬里風塵入長筭初聞橋山送弓
劍寧知玉盃人間見夜光炎炎衝斗牛會有太史占
星變人生尤物不必有時一過目驚老醜念子何忍
遽磨研少待須臾圖不朽魏衍注曰火葬之墨嘗許
生嘗語衍作此詩時少明窓淨几風日暖有愁萬斛
游尚無恙然終先逝去才八斗徑須脫帽管城公小試玉堂揮翰手

次韻晁無斁除日述懷

世學違後衆名家最近天感時猶壯志得句起衰年
素酒無何飲陶琴不具弦平生揮翰手幾見絕韋編
次韻無斁雪後

其二

閉閣春雲薄開門夜雪深江梅猶故意湖鴈起歸心
草潤留餘澤窓明度積陰慙慙報春信屋角有來禽
取性無通介隨時有異同雪餘蓋地白春淺着梢紅
寄食虛長筭魏衍注云時先生寄婦翁郭大論詩闕
近功相看不相棄賴有古人風

贈魏衍三首

妙年文墨秀儒林老眼今晨得再明
歷塊過都聊可待未須回首一長鳴

崔蔡論文不足過新詩平處到陰何
寧須萬戶權輕重不待千篇一已多

敏捷為文筆不休何妨縮手小遲留
名駒已自思千里老子終當讓一頭

贈國寶三首

承家從昔如君少得士於今孰我先
口擬說詩心已解世間快馬不須鞭

往歲黃童曠今寇君高文要學亦多聞
留年看舉天南翼過目先空冀北群

虎子墮地氣食牛雀兒浴處魚何求
可柰我衰才亦盡正須二子與同游

次韻春懷

老形已具臂膝痛春事無多櫻筍來
敗絮不温生蟻蝨大杯覆酒着塵埃
衰年此日常為客舊國當時只廢臺
河嶺尚堪供極目少年為句未須哀

河上

背水連漁屋橫河架石梁窺巢烏鵲
競過雨艾蒿光鳥語催春事窓明報
夕陽還家慰兒女歸路不應長

題柱并序

永安驛廊東柱有女子題五字云無人解妾心日

夜長如醉妾不是瓊奴意與瓊奴類讀而哀之作
二絕句

桃李催殘風雨春天孫河鼓隔天津主恩不與妍華
盡何限人間失意人

從昔嬋娟多命薄如今歌舞更能詩孰如如知一文雅
河陽令不削瓊奴柱下題

蠅虎

物微趣下世不數隨力捕生得稱虎匿形注目搖兩
股卒然一擊勢莫禦十中失一八九取吻間流血腹
如鼓却行奮臂吾甚武明日淮南作端午

陶朱公廟

一篇奏牘漫多知百戰收功未出奇名下難居身可
辱却將湖海換西施

次韻晁無斁夏雨

咫尺隔山海作書問如何蟻垤既畜糧蛙窟如鳴鼉
積暑復一雨斧斫仍手摩鈎窓欲懸麻出門已橫河
人言月離畢未必致滂沱東臯繁草木蘭艾不同科
驚魚畏密罟獨鳥鳴南柯稍無蟲飛喧復覺蟬語多
因聲作好惡與物殊未和卧聞夜來雨歸種故山禾
百年須下澤萬里付長羅先生斷百好尚以詩作魔
縮子萬言手聽渠七字哦室邇人則遠燕默勞者歌
思君得老瘦觸熱生積疴

寄無斁

敬問晁夫子官池幾許深已應飛鳥下復作卧龍吟
待我中痾愈同君把臂臨泥塗無去馬夏木自來禽
次韻別張芸叟
中年為別更堪頻四海為家託一身此別時須問生
死孰知詩力解窮人

宿深明閣

窈窕深明閣晴寒是去年老將災疾至人與歲時遷
默坐元如在孤燈共不眠莫年身萬里賴有故人憐
其二

縹緲金華伯人間第一人劇談連晝夜應俗費精神

時要平安報反愁消息真墻根霜下草又作一番新

東山謁外大父墓

土山宛轉屈蒼龍下有槃槃蓋世翁萬木刺天元自
直叢篁侵道更須東百年富貴今誰見一代功名託
至公少日拊頭期類我莫年垂淚向西風

次韻晁無斁冬夜見寄

寒窓冷硯欲生塵短枕長衾却自親老子形骸從薄
暮先生意氣尚青春覆杯不待回丹頰危坐猶能作
直身城郭山林兩無得莫年當復幾霑巾

寒夜有懷晁無斁

同好共城郭十日不一顧人事雖好乖吾生亦多忤

闔門對妻子歲月不可度閉目寧用遮停杯仍下筋
獨無區中緣永懷岩下趣平生三徑資安得一朝具
萬里初歷塊前驅告曛暮歸懷屬有思棄世不待怒
老境厭逶遲人情費將護向來張長公吾亦從茲去
燈花頻作喜月色正可步預恐何水曹明朝有新句

除夜

七十已強半所餘能幾何懸知莫景促更覺後生多
遁世名為累留年睡作魔西歸端着便老子不婆娑

寄鄧州杜侍郎

紘

南陽老幼如雲也連日城東候使君後者排前旁捷
出爭先見面作慇懃六年重來已白髮一日再見回

青春道傍過者恠相問共言杜母真吾親使君雖老
心尚壯文采風流諸謝上名家從昔杜陵人盛德于
今丈人行我昔卧病老彭城畫船鳴鼓千里行致書
饋奠初未識丁寧勞苦如平生人言此事今未有古
人中求還得否忘年屈勢不虛辱公自伯取為德吾
何取菊潭之水甘且潔潭上秋花照山白請公酌此
壽百年奕奕長為此邦伯孰先一州後四方重金疊
蓋登廟堂請從今日至雲來月三十斛輸洛陽

寄提刑李學士

石渠金馬青雲上東里西門濟水邊上冢過家真樂
事平時持節貴當年成家舊學諸儒問脫手新詩萬

口傳范叔一寒今若此相逢猶得故人憐

寄杜擇之 杜寄惠近詩

詩家兩杜昔無鄰文采風流傳雜作世有人疾置送詩
驚老醜坐曹得句自清新興來不假江山助目過渾
如草木春農馬智專吾不讓衡陽紙貴子能頻

次韻晁無斁春懷

城郭朝陽散積陰郊原注日日青深年衰鷗鷺如今
是夢斷邯鄲何處尋語鵲飛鳥春稍稍重簾深院晚
沉沉不辨杖屨衝泥雪未有瓊瑤報好音

寄晁無斁

稍聽春鳥語丁寧又見官池出斷冰雪後踏青誰與

共花間着語老猶能笑談莫倦尋常聽山院終同一
再登今日已知他日恨搶榆况得及飛騰

別寶講主

此地相逢晚他方有勝緣况功先服猛戒力得扶顛
暫息三支論重參二祖禪趙州臨濟皆曹人也夜牀鞋脚別何
日着行纏

還里

曠士愛吾廬遊子悲故鄉慷慨四方志老衰但悲傷
虛名自成誤失得略相當莫年還家樂未覺道路長
閭里喜我來車馬塞康莊爭前借言色草木亦晶光
向來千人聚一老獨徜徉手開南陽阡松柏鬱蒼蒼

永願守一丘脫身萬里航平生功名念倒海澆我腸
款段引下澤斷弦更空觴尚恐北山南有文移路傍
荅魏衍黃預勉余作詩

我詩淺短子貢墻衆目俯視無留藏句中有眼黃別
駕洗滌煩熱生清涼人言我語勝黃語扶豎夜燎齊
朝光三年不見萬里外安得一身置汝傍邇來諸子
復秀發曾未幾見加端章剽欲摧藏讓頭角豈是有
意群兒傷於人無怨我何憾愛者尚衆猶吾鄉平生
不自解朝誚禍來亦復非周防我衰氣索不自振正
賴好語能恢張詩家小魏新有聲舊傳秀句西望黃
後生學行闕師友臨路不進空迴遑看君事業青雲

上聽渠螟螣生膏盲

老栢并序

勝果院後庭有栢見之二十年矣踈瘦如故余寓
其舍數以水溉之遂有生意

庭栢無生意推殘二十秋稍霑杯水潤已與歲寒謀
黃裏青青出愁邊稍稍瘳會看笙鶴下暮雀莫深投

其二

英姿帶枯槁勁節闕和柔物理有興壞人情成去留
稍看樓鳥集聊待晚風秋解道庭前栢何曾識趙州

其三

歲月那能記風霜亦飽經槁乾仍故節潤澤出新青

色與江波共聲留靜夜聽輝輝垂重露點點綴流螢
魏衍見過

暑雨不作涼爽風抵自高我老亦衰疾柰此正鬱陶
魏侯有新語高處近風騷隱几聆五字未覺歷日勞
灑然墮水井起粟豎寒毛三山已在目萬象誰能逃
歷險見絕足過口味豚膏願為夏雷鳴莫作飢鳶號

次韻螢火

年侵觀物化共被歲時催熠熠孤光動翩翩度水來
稍能穿幔入已復受風回投卷吾衰矣微吟子壯哉

次韻夏日江村

漏屋簷生菌臨江樹作門塔簾通燕子織竹護鷄孫

向夕微風一作涼進相逢故意存一作露衣何當加我
歲從子問乾坤

次韻觀月

風雲隨落日河漢欲回天隔巷如千里還家已再圓
簾疎分細細江淨共娟娟他日吾何適聽詩說去年

次韻夏日

江上雙峯一草堂門閑心靜自清涼詩書發家功名
薄麋鹿同群歲月長句裏江山隨指顧舌端幽眇致
張皇莫欺九尺鬚眉白解醉佳人錦瑟傍

夏夜有懷

卧念張居士逃名老石根學詩端得瘦識字即空樽

鳴笛夜宜遠燈花曉更繁未須哀老子也復守丘園

送杜擇之

兩父論詩伯仲間去思今識謝家安曠懷亦苦中年
別歸翼仍愁行路難四壁未堪風雨夕百園已試雪
霜寒欲逃富貴疑無地千丈竿頭試手看

楊夫人挽詞晁無咎母

初說南奔道路長湖邊丹旆已飛揚百年積慶鍾連
璧十念收功到淨方絳幔一作未經親宋母綠衣猶
記識黃裳欲圖不朽須詮載今代誰堪著石章

桓山

平江如抱貫秦洪雙嶺馳來欲並雄是物皆為萬世

計閩推獨有一朝窮林巒特起終有汗美惡千年竟
不空尚有風流羊叔子稍經滌洗與清風有東坡記刻石

荅顏生

煩君臨問我何堪剩欲從君十日談老退不應稱敏
捷顏蒼寧復借紅酣世間公器無多取向裏宗風却
飽參陋巷遠孫還好學未容光祿擅東南

送劉主簿義仲字壯與

平生師友豫章公矻矻談君口不空半面相看吾已
了連城增價子何窮三千奏牘諸儒上四百菴寮一
歲中二父風流皆可繼謗禪排道不須同

觸目

溪響飢魚食川明柱影斜驚禽穿密竹噪鵲立浮查
谷暗山藏雨林喧雀啅蛇鄉間等行路何處一作更
為家

晚望

黑雲映黃槐更着白鳥度蟬鳴不餘力蛙腹能許怒
稱目有佳思側徑無好步興來成獨徃意得誰與賦

送高推官

先生鍾舊德大府冠群能過手無難事逢人有異稱
薦賢餘一鶚夙記契千燈看挽秦梁纜頭頭數不勝

和黃預感秋

宿雲護朝霜秋陽佐殘暑蠅癡驅復來汗下拭莫禦

庭梧自黃墮風過成夜語幸是可憐生胡然遽如詐

黃生多新詩如盆

一作盞

蘭抽緒唱高難款乃雋永得

呖咀意合無古今投暗有迎拒名成弟子韓價重先

生褚向來得斯人孰謂予齟齬晚炊鄰僧米晝捨狙

公芋甘酸皆適口霜黃一作盡未登俎門有曲逆車謗

甚北山女寧為溝中斷不作太倉鼠老退無好懷續

明然兩炬搔首不成眠寒蟲促機杼

和顏生同遊南山

竹杖芒鞋取次行琳琅觸目路人驚當年此日仍為
客病目今來喜再明筋力尚堪供是事登臨那得總
無情已知名世徒為爾可復緣渠太瘦生

僧慧僧和同往南山

驥駮同群鴻鴈行登臨端為作重陽南臺二謝風流
絕準擬歸來古錦囊

栢

用直寧論世名成不待官低枝綠我有偃蓋到誰看
秀色有新故英姿無暑寒要為千歲計豈慮萬牛難

謝端硯

王家舊物群偷後石出蠻溪百丈深揮翰吾非玉堂
手斷金君有古人心

捕狼

一狼將四子二嶺走千羊意得無前敵時乖關後防

寧知射生手已發努機張會使烏鳶飽空令豺虎傷

和魏衍元夜同登黃樓

車馬競清夜人物秀三楚登臨得免俗茲樓豈時睹
同來兩稚子冠者亦四五落落俱可人頗亦厭歌鼓
山月出未高潛鱗動寒渚檣燈接稀星奪目粲不數
魏侯轉物手百好趨就叙得句未肯吐秀氣出眉宇
水淨納行影山空吞脩語夜氣稍侵肌鳥駭去其侶
清游豈有極喜事戒多取投靜未免喧于今豈非古
永懷寂寞人南北忘在所橫嶺限魚鳥作書欲誰與
情生文自哀意動足復佇憑檻一作共一默望舒已
侵午

和元夜

笳鼓喧燈市車輿避火城彭黃彭祖樓爭地勝汴泗
迫人清梅柳春猶淺關山月正一作明賦詩隨落筆
端復可憐生

和魏衍同遊阻風

舊說東風末世情不應作意斷人行絕須一怒催新
句更可多憂促短生勝日着忙端取怪妙年得此未
須驚懸知出處非吾事已復星河爛熳晴

和魏衍同登快哉亭

經時不出此同臨小徑新推草舊侵欲傍江山看日
落不堪花鳥已春深乘牛去馬中年眼朗月清風萬

里心故着連峯當極目回看幽徑遶雙林

登快哉亭

城與清江向泉流亂石間夕陽初隱地暮藹已依山
度鳥欲何向奔雲亦自閑登臨興不盡稚子故須還

招黃魏二生

出門不雨即遇風閉門值睡極力攻似聞湯鼎作吟
聲已賀勝敵收全功却思二子共一笑撥棄舊語無
新工卒行好步不兩得能致公等吾何窮魏詩黃筆
今未有顧我獨得神所鍾徑須相就踏泥潦已辦煮
餅澆油葱

後山先生集卷第二



